

## 2. YOHANES DIMARANAKATN : HARAPAN KA' DALAPM KASUSAHATN

### TEKS : Lukas 1:5-25

<sup>5</sup> Wa'tu Herodes jaji Raja ka' wilayah nagari Yudea, ada seko' urakng imam nang badama Sakaria. Ia anggota ka' pakomo'an Imam Abia. Bini Sakaria nang badama Elisabet uga' katurunan Imam Harun. <sup>6</sup> Kaidupatn nyadua laki-bini koa ngarepoatn ati Tuhan Allah. Jukut nyadua sidi ngasi' ka' sigana hal ka' parentah man ukum Tuhan Allah. <sup>7</sup> Nyadua ina' baranak, jukut Elisabet koa ina' baya babuntikng, nyadua koa uga' dah tuha.

<sup>8</sup> Wa'tu koa taka' pakomo'an Imam Abia namu giliran, Imam Sakaria nang batugas ngalayani' Tuhan Allah ka' Rumah Kudus Tuhan Allah. <sup>9</sup> Lea biasanya na' imam cabut undi untu' nantuatn sae nang nunua' kamanyan ka' bagian Rumah Kudus Tuhan Allah, nang badama Ruang Kudus. Rupanya undian koa jantu' ka' Sakaria nang arus batugas. <sup>10</sup> Samintara upacara nunu kamanyan nyambah Tuhan Allah koa dimanjawat, urakng rami ka' teras Rumah Kudus Tuhan Allah badoa. <sup>11</sup> Wa'tu koa malaekat Tuhan Allah nele'atn diri'nya ka' Sakaria. Malaekat koa badiri ka' sabalah kanan meja tempat nunu kamanyan nyambah Tuhan Allah. <sup>12</sup> Taka' Sakaria nele' malaekat koa ia kaheranan man gali'. <sup>13</sup> Tapi malaekat koa bakata, "Ame gali', Sakaria! Tuhan Allah dah nangar doa kita', man bini kita' Elisabet maranakatnna' kamuda' nanglaki. Kita' arus mare' kamuda' koa dama Yohanes. <sup>14</sup> Kita' sidi barepoa' ati man banyak urakng barepo-repoa' kade' kamuda' koa dah lahira' ana! <sup>15</sup> Ia jajia' urakng nang panting nurut panele'anan Tuhan Allah. Ia ina' mulih nyocok anggur man cocokatn nang nyuruh kamabuk. Dari lahirnya kamuda' koa, Roh Tuhan Allah bakuasa ka' ia. <sup>16</sup> Ia ngincaknga' banyak urakng Israel mulakng ngasi' ka' Tuhan Allah, Tuhannya urakng Israel koa. <sup>17</sup> Yohanes kuata' man bakuasa lea nabi Elia. Ia madameana' apa' man anak, man uga' urakng nang ina' taat, nya incaknga' mulakng agi' ka' pamikiran nang gagas. Lekoalah Yohanes ataknga' sanape' Tuhan Allah, untu' nyiapatnna' umat nang siap untu' idup man cara nang di Tuhan Allah mao'i'."

<sup>18</sup> "Lemae aku nau'an jukut koa jajia'?" jakata Sakaria ka' malaekat koa. "Aku dah tuha, biniku uga' dah tuha."

<sup>19</sup> Malaekat koa nyahut, "Aku nian Gabriel, nang jaji palayan Tuhan Allah. Ialah nang nyuruh aku nyampeatn kabar nang gagas nian ka' kita'.

<sup>20</sup> Ahe nang ku ngataatn tentang kamuda' koa pasti jajia' ka' wa'tunya. Tapi tagal kita' ina' pucaya', ka' ahe nang ku ngataatn, kita' jajia' awa'. Ina' pane ngomong sampe kamuda' koa dimaranakatn."

<sup>21</sup> Samintara koa urakng rami tatunggu-tunggu ka' Sakaria. Ia ka' koa jaji kaheranan ngahe Sakaria lama sidi ka' dalapm Rumah Kudus Tuhan Allah. <sup>22</sup> Wa'tu Sakaria kaluas, ia ina' pane ngomong ka' urakng rami koa. Ia make kode man langannya, jukut ia dah awa'. Urakng rami ka' koapun jaji nau'an kade' Sakaria dah nele' hal nang ajaip ka' dalapm Rumah Kudus Tuhan Allah.

<sup>23</sup> Dah laka' nyalanan tugasnya ka' dalapm Rumah Kudus Tuhan Allah, Sakaria pulakng ka' rumahnya. <sup>24</sup> Ina' sangahe lama laka' koa, Elisabet bininya babuntikng. Elisabet ina' ngaluas-ngaluas dari rumahnya salama lima bulatn. <sup>25</sup> Ia bakata, "Nianlah tanda kabaikatn Tuhan Allah ka' aku, Ia dah ngapus kasupe'atnku nang miah ka' urakng rami."

### PAMULAATN

Lemae parasaatn kita' taka' ada janji nang ina' dipanuhi? Dari pamulaatn kitab Lukas, kateleatn seolah-olah ada sangahe janji nang ina' Tuhan Allah panuhi. Dah ampat ratus tahutn bangsa Israel na suah nangar pasatn dari Tuhan Allah nang di nabi-nabi nyampeatn. Ampeatn bangsa

Israel di bangsa Roma nyajah. Tuhan Allah suah bajanji “Kuasa Jaji raja” ina' dipindaha' dari suku Yehuda man katurunannya marentaha' salama-lamanya. Tapi ka' dian, Herodes nang buke' urakng Yahudi tagah marentah. Sakaria man Elisabet dinyabut urakng banar ka' adapatn Tuhan Allah, tapi ina' ngampu anak. Ka' dalapm budaya urakng Yahudi, nangbini nang ina' baranak dinganggap dingukum ato dingutuk. Tapi ka' dalapm kaadaan lea nian, Tuhan Allah ngiripm malaekat untu' nyampeatn kabar nang luar biasa. Ahe nang manjawat kita' tatap pucaya ka' janji Tuhan Allah ka' dalapm kaadaan nang sidi susah?

### **NANG DITALITI**

- Ahe nang diri' palajari tentang Sakaria man Elisabet? (ayat 5-7)
- Ahe tugasnya Sakaria? (ayat 8-10)
- Ahe nang diri' nau'an tentang kamuda' nang diparanakatnna' koa? Ada kurang labih dua balas hal nang dibare' nau'an tentang kamuda koa. (ayat 13-17)
- Lemae Sakaria narima barita mpat ka' malaekat koa? Ahe akibatnya? (ayat 18-23)
- Lemae parasaatn Elisabet taka' nya babuntikng? (ayat 25)

### **NGAGOI' MA'NANYA**

- Biasanya saurakng imam kahe namu giliran untu' nunu kamanya ka' Rumah Kudus Tuhan Allah kahe sakali dalapm kaidupatnnya. Kamanyan koa lambang doanya umat Tuhan Allah. Kira-kira, ngahe Tuhan Allah milih wa'tu koa untu' ngomong ka' Sakaria?
- Bagiatn ahe dari pakataatn malaekat koa nang susah di Sakaria pucaya'i'? Kira-kira ngahe ia ina' pucaya'?
- Kira-kira, ngahe Tuhan Allah ngutus Yohanes nyintolo'ia' Mesias? Ngahe Ia ina' langsung ngutus Yesus ihan?

### **PENERAPAN**

- Ka'dalapm hal ahe sodara jaji marasa kacewa ka' Tuhan Allah? Ngahe? Kira-kira lemae pangalaman Sakaria man Elisabet bisa nguatatnna kapucayaatn sodara?
- Sakaria sidi takajut wa'tu Tuhan Allah ngomong ka' ia lewat malaekat. Ahe nang sodara bisa panjawat minggu nian supaya labih siap untu' nangar pakataatn dari Tuhan Allah?

### **BATUKAR PANDAPAT**

- Ahe bedanya batanya ka' Tuhan Allah, man ina' pucaya ka' Tuhan Allah?
- Ahe tanda-tanda ka' dalapm kaidupatn diri' kade diri' ina' pucaya Tuhan Allah? Ahe ge' akibatnya?

### **NANG ARUS DIRI PANJAWAT**

- Atakng ka' Tuhan Allah ka' dalapm doa tiap ari, man nyarahatn ka' Ia ahe nang manjawat diri kacewa man ragu ka' panggilanNya dalapm kaidupatn sodara.

### **DOA**

- Badoa ka' Tuhan Allah biar Tuhan Allah manto' sodara pucaya ka' janji-janji-Nya.

Badoa untu' urakng-urakng ka' gunar kita' nang gi' tagah ngalami kakasalatn ka' dalapm kaidupatnnya